

**A N U N C I O**

O Pleno do Concello de Cangas, en sesión de data do 10/01/2014, acordou aprobar expresamente, con carácter definitivo, a redacción final do texto da “Ordenanza reguladora da limpeza viaria e ornato público no concello de Cangas”, unha vez resoltas as alegacións presentadas e incorporadas á mesma as modificacións derivadas das reclamaciones estimadas, o que se fai público para o seu xeral coñecemento e en cumprimento do disposto no artigo 70.2 da Lei 7/1985, de 2 de abril, Reguladora das Bases do Réxime Local.

**ORDENANZA REGULADORA DA LIMPEZA VIARIA E ORNATO PÚBLICO
NO CONCELLO DE CANGAS****P R E Á M B U L O**

A presente ordenanza municipal de limpeza viaria e ornato público ten por obxecto regular, dentro da esfera das competencias municipais, a limpeza das vías e o ornato público establecendo unhas normas xerais de actuación ao respecto, así como un sistema de infraccións e sancións para o caso de incumprimento.

Con iso, preténdese facer do municipio de Cangas un lugar máis hixiénico, máis limpo e habitable, de xeito que a veciñanza poida colaborar e ser partícipe da mellora hixiénica que o aumento e crecemento continuo do Concello require.

A razón desta ordenanza é, esencialmente, orientar, informar e, no seu caso, sancionar á cidadanía no seu desenvolvemento cotián no medio en que está inserto, no ámbito municipal en todo o relativo á limpeza viaria, así como a través dunha maior concienciación cidadá para colaborar con que o noso municipio permaneza limpo

Así pois, o Concello de Cangas, no exercicio das potestades regulamentaria e de autoorganización, aproba a seguinte ordenanza:

**TÍTULO PRELIMINAR
DISPOSICIÓN XERAIS****ARTIGO 1.—OBXECTO DA PRESENTE ORDENANZA**

A presente ordenanza ten por obxecto a regulación, dentro do ámbito das competencias do Concello de Cangas, daquelas actividades dirixidas á limpeza das vías e espazos públicos, fomentando actitudes encamiñadas á eliminación da sucidade e ao mantemento da limpeza e do ornato público en todo o termo municipal.

Toda a veciñanza debe cumprir as prescricións contidas na presente ordenanza e nas normas complementarias que no seu caso se ditén.

ARTIGO 2.—FUNDAMENTO

1.—A regulación da presente ordenanza réxese polos principios do artigo 45 da Constitución española, artigos 25 e 26 da Lei 7/85, do 2 de abril, reguladora das bases do réxime local, respecto da obriga de velar por un medio ambiente axeitado para o desenvolvemento da persoa e de prestar os servizos de limpeza viaria.

2.—Artigo 4.1. a) da Lei 7/85, do 2 de abril, reguladora das bases do réxime local, art. 6.1. a) da Lei 5/97, do 22 de xullo, de administración local de Galicia e art. 4.1. a) do Real decreto 2568/86, do 28 de novembro, respecto das potestades regulamentaria e de autoorganización.

3.—Artigo 4.1. f) da Lei 7/85, do 2 de abril, reguladora das bases do réxime local e disposición adicional única da Lei 11/99, do 21 de abril, de modificación da Lei 7/85, do 2 de abril, respecto da potestade sancionadora pola comisión de infraccións, sendo de aplicación supletoria, para a súa tramitación, o procedemento previsto no Real decreto 1398/1993, do 4 de agosto.

4. – Lexislación sectorial.

- Lei 1/1995, do 2 de xaneiro, de protección ambiental de Galicia.
- Lei 10/2008, do 3 de novembro, de residuos de Galicia.
- Lei 22/2011, do 28 de xullo, de residuos e solo contaminado.
- Lei 34/1988, do 11 de novembro, xeral de publicidade.

ARTIGO 3. – ÁMBITO OBXECTIVO DA PRESENTE ORDENANZA

1. – Para os efectos da presente ordenanza, enténdese por vía pública os paseos, rúas, avenidas, prazas, beirarrúas, xardíns, zonas verdes e demais bens de propiedade municipal destinados directamente ao uso común xeral da veciñanza, quedando, por tanto, excluídas as urbanizacións privadas, xardíns particulares, pasaxes pechadas, patios interiores, solares privados, accesos a garaxes, galerías comerciais e similares, cuxa limpeza é responsabilidade dos/das particulares, sexa en propiedade única, compartida ou en réxime de propiedade horizontal. O Concello de Cangas exercerá o control da limpeza destes elementos e poderá obrigar, no seu defecto, as persoas responsables, independentemente das sancións a que dera lugar a súa actuación.

2. – Así mesmo, quedan excluídos do ámbito desta ordenanza os terreos ou bens que, aínda sendo de propiedade municipal, estean sometidos a un uso común especial ou a un uso privativo por particulares, entidades públicas ou privadas ou outras administracións públicas, logo das correspondentes licenzas e concesións respectivamente.

ARTIGO 4. – DEFINICIÓNS

Para os efectos da presente ordenanza, entenderanse:

1. – Por rótulos, os anuncios fixos ou móbiles realizados mediante pintura ou calquera outro material destinado a conferir-lles unha longa duración.

2. – Por carteis, os anuncios (impresos, pintados ou escritos) sobre papel ou outro material de escasa consistencia. Se son de formato reducido e distribución manual, os carteis terán a consideración de panfletos.

3. – Por pancartas, os anuncios publicitarios de gran tamaño, situados na vía pública sobre un soporte non ríxido.

4. – Por pintadas, as inscricións realizadas na vía pública sobre os muros ou paredes dos edificios ou sobre calquera dos elementos estruturais ou do mobiliario urbano.

5. – Por bandeirolas, os anuncios publicitarios de escaso tamaño e que, como colgantes, adoitan dispoñerse suxeitos a un elemento común que na maioría dos casos se apoia en partes de edificios ou mobiliario urbano.

6. – Por adhesivos, os impresos dotados de material adhesivo nunha das súas caras que poidan aplicarse directamente en calquera outro elemento sólido.

7. – Por panfletos e folletos, os fragmentos de papel ou de material análogo que se distribúen á cidadanía ou se depositan na vía pública, vehículos, caixas do correo exteriores, etc.

TÍTULO I

LIMPEZA DE ESPAZOS PÚBLICOS

Capítulo I: Obrigas

ARTIGO 5. – LIMPEZA DA REDE VIARIA PÚBLICA

A limpeza da rede viaria pública, tanto de tránsito rodado como peonil, será realizada polos servizos municipais coa frecuencia conveniente e a través das formas de xestión que acorde o Concello de Cangas conforme coa lexislación en vigor.

**ARTIGO 6.—ZONAS PRIVADAS**

A limpeza das rúas, espazos e terreos de dominio particular levarase a cabo polos seus donos ou donas seguindo as directrices que marque o Concello para acadar niveis adecuados de hixiene.

As comunidades de propietarios/as ou quen habite o inmovible ou inmovibles lindeiros están obrigados a manter limpos os patios de luces, patios de quinteiro ou calquera espazo sen edificar anexo ao edificio sexa común ou propio, rexéndose para o efecto polas súas normas estatutarias e, no seu defecto, pola directrices do Concello, non podendo, en ningún dos casos, contradicir a presente ordenanza.

ARTIGO 7.—SOLARES E TERREOS PRIVADOS

A limpeza de solares e outros terreos de propiedade particular que se atopen en solo urbano e non estean incluídos no artigo anterior corresponderalle, igualmente, á propiedade.

O cumprimento da obriga de manter limpos os terreos non exime de levar a cabo o seu valado ou peche, conforme coa normativa urbanística e demais disposicións sobre réxime do solo.

ARTIGO 8.—DEPÓSITO DE RESIDUOS DOMICILIARIOS

Os residuos incluídos na recollida de lixo domiciliaria depositaranse en envases non retornables e resistentes, separando adecuadamente a materia orgánica da inorgánica e depositando cada unha no colector correspondente.

Cartón, papel, envases e vidro depositaranse nos colectores dispostos para o efecto. No caso de cartóns, embalaxes e caixas depositaranse convenientemente pregados. O horario de depósito das bolsas de residuos orgánicos e inorgánicos será entre as 20:00 h. e as 08:00 h. todos os días de semana.

*Capítulo II: Prohibicións***ARTIGO 9.—USUARIOS/AS DE VÍAS PÚBLICAS**

Prohíbese tirar á vía pública todo tipo de residuos. Quen transite polas rúas, prazas, xardíns e outros espazos públicos e queira desprenderse de residuos de pequena entidade (cabichas, cáscaras, papeis, etc.) utilizarán as papeleiras instaladas para tal fin.

Os usuarios/as absteranse de toda manipulación sobre as papeleiras, así como de realizar calquera acto que as deteriore ou as inutilice para o uso ao que están destinadas.

ARTIGO 10.—PROHIBICIÓNS EN VÍAS E ESPAZOS LIBRES

Queda prohibida calquera operación que poida ensuciar as vías e espazos libres públicos e, en especial:

- Lavar ou limpar vehículos, así como cambiarlles o aceite ou outros líquidos.
- Manipular ou dispersar residuos ou alterar os seus envases.
- Sacudir prendas ou alfombras na vía pública ou sobre ela dende fiestras, balcóns ou terrazas.
- Tirar á vía pública calquera clase de refugallos dende vehículos, xa estean parados ou en marcha.
- Tirar fóra das papeleiras os residuos de tamaño pequeno, como papel, envoltorios ou similares ou ben baleirar o contido das papeleiras na vía pública.
- Tirar materiais acendidos en papeleiras, colectores ou outra clase de mobiliario urbano destinado á recollida de residuos que, en todo caso, deberán depositarse unha vez apagados.
- Cuspír na rúa e satisfacer necesidades fisiolóxicas na vía pública ou en calquera outro espazo que non sexa o destinado expresamente para tal fin.
- Tirar dende balcóns e terrazas calquera clase de residuos, restos de arranxo de macetas ou outro obxecto que puidera causar danos ou molestias a persoas ou cousas.



- Verter auga sucia sobre a vía pública, solares ou zonas axardinadas, así como o desaugadoiro de aparatos de refrixeración sobre eles.
- Abandonar na vía pública os produtos de varrido e limpeza dela, producidos polos/as particulares ou depositar polos comercios e locais públicos ou privados caixas ou bolsas nas beirarrúas ou fachadas dos edificios
- Regar as plantas instaladas no exterior dos edificios se a consecuencia desta operación se producen vertidos ou salpicaduras sobre a vía pública ou sobre os seus elementos.
- Abandonar mobles e tarecos particulares na vía pública, agás os que estean en espera de ser retirados polo servizo especial de recollida deles.
- Ter a roupa tendida á vista sobre a vía pública, sen prexuízo da prohibición xenérica de instalar tendais nas fachadas dos inmobles.

Capítulo III: Medidas aplicables aos/ás titulares de actividades concretas

ARTIGO 11.—TITULARES DE ESTABLECEMENTOS

1.—Quen estea ao fronte de quioscos ou postos autorizados na vía pública están obrigados a manter limpo o espazo en que desenvolven o seu cometido e as súas proximidades durante o horario en que realicen a súa actividade e deixalo no mesmo estado unha vez finalizada. Prohíbese aos establecementos comerciais a exposición ao público, fóra dos seus locais, dos obxectos que posúan para a venda, a non ser que se coloquen en vitrinas, tras a correspondente autorización municipal.

2.—A mesma obriga incumbe aos donos/as de cafés, bares e establecementos análogos en canto á superficie que ocupen con veladores, mesas, cadeiras... así como da beirarrúa correspondente á lonxitude da súa fachada, resultando de aplicación o disposto na ordenanza específica aprobada ao efecto

3.—Os/as titulares dos establecementos, quioscos ou postos, deberán instalar e manter pola súa conta as papeleiras necesarias. A recollida dos residuos acumulados nelas realizarase pola persoa titular do establecemento.

ARTIGO 12.—VEHÍCULOS DE TRANSPORTE

As persoas propietarias ou condutoras de vehículos que transporten terras, entullos, materiais pulverulentos, áridos, formigón, cartóns, papeis ou materiais similares terán que tomar cantas medidas sexan precisas para cubrir tales materiais durante o transporte e evitar que pola súa natureza ou pola velocidade do vehículo ou do vento caian sobre a vía pública.

Así mesmo, antes de saír das obras, xacementos de grava, etc. terán que lavarse os baixos e rodas dos vehículos para impedir que ensucien as vías públicas, mediante calquera sistema de lavado, podendo os servizos técnicos municipais esixir o uso doutro sistema que se considere máis efectivo.

Os vehículos destinados aos traballos de construción darán cumprimento ás prescricións que se establecen sobre transporte e vertido de terras e entullos.

Queda prohibido o transporte de formigón con vehículo formigoneira sen levar pechada a boca de descarga cun dispositivo que impida o vertido de formigón na vía pública. Prohíbese limpar as formigoneiras na vía pública.

ARTIGO 13.—CARGA E DESCARGA DE VEHÍCULOS

Finalizadas as operacións de carga, descarga, saída ou entrada a obras, almacéns, etc. de calquera vehículo que poida producir sucidade na vía pública, o persoal responsable das citadas operacións e, subsidiariamente, as persoas titulares dos establecementos e obras onde se efectuaran e, en último termo, o propietario/a ou o condutor/a do vehículo, limparán a vía pública e os elementos desta que se ensuciaran e retirarán os materiais vertidos. As persoas mencionadas no apartado anterior, e pola mesma orde, serán as responsables das infraccións e dos danos que delas se deriven.

*ARTIGO 14. – OBRAS NA VÍA PÚBLICA*

Cando se realicen pequenas obras na vía pública, os materiais sobrantes e entullos terán que ser retirados dentro das vinte e catro horas seguintes á terminación dos traballos, deixándoos, entre tanto, debidamente amoreados para non perturbar a circulación de persoas e vehículos.

Cando pola entidade das obras estas requiran da utilización de colectores para almacenaxe de entullos, a vía pública estará libre destes elementos durante as fins de semana e festivos, para o que os colectores e provisións de material deberán retirarse antes das 19:00 horas do venres ou do día anterior ao festivo correspondente e, en todo caso, dentro das vinte e catro horas seguintes á finalización dos traballos.

Do mesmo xeito, a vía pública deberá quedar libre de toda maquinaria utilizada para a realización das citadas obras respectándose o horario prescrito anteriormente.

Cando se trate de obras na vía pública, independentemente das medidas de seguridade viaria, deberán instalarse valos debidamente sinalizados nos que se reflectirá o nome da empresa contratista e/ou promotora, así como elementos de protección da obra e tubos para a carga e descarga de materiais e produtos de derriba que deberán reunir as condicións necesarias para impedir a sucidade na vía pública e que se causen danos a persoas ou cousas.

Cando se trate de edificios en construción, rehabilitación, reforma ou derribo, será o/a contratista da obra o/a responsable da limpeza da vía pública e da limpeza de camiños e rúas en todo o percorrido polo termo municipal que efectúen os vehículos adscritos á obra.

TÍTULO II
LIMPEZA DE EDIFICACIONES

ARTIGO 15. – PARTES VISIBLES

As persoas propietarias das fincas, vivendas e establecementos, ou subsidiariamente as titulares, están obrigadas a mantelas nas debidas condicións de seguridade, limpeza e ornato público.

As comunidades de propietarios/as dos edificios ou os propietarios/as de fincas, vivendas e establecementos están obrigados a manter limpas e en bo estado as fachadas, os rótulos de numeración dos portais, as medianeiras descubertas, as entradas, as escaleiras de acceso e, en xeral, todas as partes dos inmobles que sexan visibles dende a vía pública.

As persoas propietarias (particulares ou promotoras e construtoras) dos baixos deberán pechalos debidamente con ladrillo ou bloque, levando a cabo o seu recebado, salpicado e, en todo caso, pintado.

Para estes efectos, os propietarios/as deberán proceder aos traballos de mantemento, limpeza, recebado e estucado cando por motivos de ornato público sexa necesario ou o ordene a autoridade municipal, logo do informe dos servizos municipais competentes.

Así mesmo, os propietarios/as de muros existentes confeccionados en bloques de formigón que dean a unha vía pública deberán encalalos ou pintalos en cor branca ou verde.

Suposto o incumprimento dos apartados anteriores, e logo do trámite de audiencia, o Concello requirirá dos/das responsables que no prazo que se lles sinale realicen as obras ou operacións necesarias.

ARTIGO 16. – PRECAUCIONES

Cando se realicen limpeza de escaparates, portas, toldos, etc. adoptaranse precaucións para non causar molestias aos transeúntes nin ensuciar a vía pública. Se se ensuciase por tal motivo, os donos ou donas do inmovible limparán os residuos.

Iguais precaucións terán que adoptarse para a limpeza de balcóns e terrazas, así como para o rego de plantas instaladas neles.

*ARTIGO 17. – PROHIBICIÓNS*

Co obxecto de manter as condicións de limpeza que esixen o ornato e a estética do municipio, queda prohibido:

- a) Realizar inscricións ou pintadas nas paredes, muros, cabinas, fachadas, valos e no mobiliario urbano.
- b) Colocar carteis en lugares non autorizados expresamente para iso (árbores, mobiliario urbano, edificios públicos, etc.)
- c) Romper, ensuciar ou arrancar os carteis ou anuncios situados nos lugares autorizados para o efecto.
- d) Botar material publicitario de xeito indiscriminado á vía pública mediante a repartición manual de publicidade
- e) Empregar animais como instrumento ou complemento da actividade publicitaria.

*TÍTULO III**LIMPEZA E MANTEMENTO DE URBANIZACIÓNS E FINCAS
DE PROPIEDAD PRIVADA**ARTIGO 18. – OBRIGAS*

Correspóndelles aos propietarios/as a limpeza das beirarrúas, pasaxes, calzadas, prazas, etc. das urbanizacións de dominio e uso privado. Será tamén obriga dos propietarios/as a limpeza dos patios interiores de quintero, as fincas particulares, as galerías comerciais e similares. Dende as fincas particulares, non pode sobresaír á vía pública ningunha clase de vexetación ou maleza.

O Concello exercerá o control e inspección do estado de limpeza dos elementos obxecto dos apartados anteriores e poderá requirir das persoas responsables a súa limpeza, de acordo coas instrucións que para o efecto ditén os servizos municipais.

Os propietarios/as de fincas deberán mantelas libres de refugallos e residuos e nas debidas condicións de salubridade, hixiene, seguridade e ornato público. A prescrición anterior inclúe a esixencia da súa desratización e desinfección.

Os solares sen edificar valaranse convenientemente co recuamento e alturas que marquen as normas subsidiarias ou plan xeral de ordenación municipal co fin de manter as condicións adecuadas de seguridade e salubridade.

*TÍTULO IV**NORMAS ESPECIAIS**ARTIGO 19. – CARTEIS E ANUNCIOS*

As persoas propietarias ou titulares de inmobles coidarán de manter limpas as paredes ou fachadas de calquera tipo de anuncio que non sexa o específico dunha profesión ou actividade mercantil.

A colocación de carteis, rótulos de establecementos ou anuncios realizarase na forma que se estableza na autorización ou licenza municipal que se outorgue ao respecto.

A colocación de carteis, pancartas, bandeirolas, a distribución de panfletos e calquera outra actividade publicitaria das reguladas no presente título está suxeita á previa autorización municipal.

A concesión da autorización municipal para os elementos publicitarios aquí definidos levará implícita a obriga pola persoa solicitante de limpar os espazos da vía pública que se tiveran ensuciado e de retirar dentro do prazo autorizado todos os elementos publicitarios que se tivesen utilizado e os seus correspondentes accesorios.

Para a colocación ou distribución na vía pública dos elementos publicitarios aquí sinalados, o Concello poderá esixir a constitución de fianza pola contía correspondente aos custos previsibles de limpar ou retirar da vía pública os elementos que puideran causar sucidade.



Prohíbese a colocación de carteis, bandeirolas, pancartas, rótulos, adhesivos, así como calquera outro elemento publicitario ou de comunicación fóra dos lugares que expresamente sexan autorizados polo Concello (e en concreto nas fachadas dos edificios públicos ou no mobiliario ou equipamento urbanos como por exemplo farois, bancos ou marquesiñas).

Prohíbese toda clase de actividade publicitaria das reguladas no presente título nos edificios cualificados como histórico-artísticos ou asimilados. Exceptuaranse aqueles que fagan referencia ás actividades que teñan lugar no edificio ou a obras de conservación, reforma ou rehabilitación deles.

A colocación de pancartas e bandeirolas na vía pública soamente se autorizará:

- a) En período de procesos electorais.
- b) En período de festas populares e tradicionais.
- c) Nas situacións expresamente autorizadas pola autoridade municipal competente.

A autoridade municipal regulará en cada caso as condicións en que poderán utilizarse os espazos que para tal fin destine o Concello e a tramitación necesaria para solicitar a correspondente autorización.

Prohíbese a colocación de pancartas e bandeirolas suxeitas ás árbores en calquera dos seus elementos.

A solicitude de autorización para a colocación de pancartas ou bandeirolas deberá acompañarse de:

- a) Memoria explicativa.
- b) Plano de situación dos lugares onde se pretenden colocar.
- c) Plano de detalle co contido e dimensións das pancartas ou bandeirolas.
- d) Duración da instalación.
- e) Orzamento detallado de instalación e da súa retirada.
- f) O compromiso do/da responsable de retiralas e de reparar os danos causados na vía pública ou nos seus elementos estruturais.
- g) Póliza de seguros de responsabilidade civil para responder dos danos que puideran ocasionarse como consecuencia da colocación de pancartas e bandeirolas.

As pancartas ou bandeirolas suxeitas aos elementos estruturais da vía pública deberán situarse a unha altura mínima de colocación que será de 5 m. medida no punto máis baixo cando afecte á calzada ou aparcamentos e de 3 m. en beirarrúas, paseos e outras zonas peonís.

As pancartas e bandeirolas deberán ser retiradas polas persoas responsables da súa colocación tan pronto como caducase o prazo para o que foron autorizadas. De non facelo así, serán retiradas polos servizos municipais imputándose ás persoas responsables os custos correspondentes ao servizo prestado, sen prexuízo da imposición das sancións a que houbese lugar.

Quedarán excluídas desta regulación o seguinte tipo de publicidade:

- A instalación de rótulos, bandeirolas e carteis luminosos nas fachadas que indiquen denominación social de persoas físicas ou xurídicas ou o exercicio de actividade mercantil, industrial, profesional ou de servizos que quedan sometidos á concesión de licenza e ó pagamento previo de taxa ao abeiro da lexislación urbanística.
- Os rótulos colocados nas obras en execución coa finalidade de indicar o tipo de obra, a empresa, os materiais, etc.
- A publicidade realizada polo propio Concello ou co consentimento deste.
- As mensaxes publicitarias realizadas a través de vehículos.
- Quedan excluídas do ámbito de aplicación desta ordenanza: a publicidade electoral que se rexerá polo establecido na Lei orgánica 5/1985 de réxime electoral xeral, se ben, cada partido político que coloque a publicidade electoral será responsable da súa retirada unha vez transcorrido o período electoral, os comunicados das administracións públicas de interese xeral ou particular, os comunicados sobre seguridade pública, protección civil ou emerxencias, comunicados relativos ao capítulo II do título I da Constitución e publicidade das estacións de vehículos de transporte público.

*ARTIGO 20.—REQUISITOS DA REPARTICIÓN DOMICILIARIA DE PUBLICIDADE:*

- A publicidade depositarase no interior das caixas do correo dos cidadáns e cidadás e/ou naqueles espazos que os veciños e veciñas dispoñan para a súa colocación.
- Non poderá depositarse de forma indiscriminada ou en desorde nas escaleiras ou na zona de acceso aos inmobles dende a vía pública.
- Preferentemente, o material publicitario deberá realizarse en papel reciclado favorecendo o uso de tinturas ecolóxicas e evitando o emprego de papel branqueado con cloro ou plastificacións e deberá pregarse tendo en conta o tamaño máis habitual das caixas do correo. Recoméndaselles tamén ás empresas que inclúan na publicidade mensaxes de educación ambiental de xeito que, unha vez cumprida a súa función, se deposite nos colectores de recollida selectiva de papel e cartón garantindo a súa reciclaxe.

ARTIGO 21.—PINTADAS

Prohíbese toda clase de pintadas na vía pública, tanto sobre os seus elementos estruturais, calzadas, beirarrúas e mobiliario urbano, como sobre os muros, paredes, estatuas, monumentos e calquera elemento externo.

Poderanse autorizar as pinturas murais ou que posúan un fin de comunicación social realizadas sobre os valos dos solares, peches de obra, paredes medianeiras vistas, etc.

As expresións artística ou de comunicación social de carácter permanente (feitos con materiais facilmente eliminables cos métodos habituais de limpeza urbana) que non se realicen sobre os soportes anteriores tamén poden ser obxecto de autorización.

ARTIGO 22.—DISTRIBUCIÓN DE PANFLETOS OU SIMILARES

Prohíbese espaxer e tirar sobre a vía pública toda clase de panfletos ou materiais similares.

Os servizos municipais correspondentes limparán os espazos públicos que se visen afectados pola distribución ou dispersión de panfletos ou folletos imputándolles ás persoas responsables o custo dos servizos extraordinarios prestados, sen prexuízo da imposición das sancións que correspondan.

ARTIGO 23.—TERRAS E ENTULLOS

1.—Prohíbese depositar na vía pública toda clase de entullos ou refugallos procedentes de obras de construción e remodelación de inmobles ou de obras realizadas no seu interior.

2.—Igualmente, queda prohibido almacenar na vía pública, fóra dos límites dos valos protectores de obras, o material de construción.

3.—Os residuos e materiais aos que se refire o presente artigo só poderán ser almacenados na vía pública utilizando colectores adecuados ao cumprimento da normativa aplicable e na forma e condicións autorizadas polo Concello.

4.—Os colectores para obras serán retirados da vía pública:

- 1.—Ao expirar o termo da concesión da licenza de obras.
- 2.—Cando existan razóns de interese público logo do requirimento da autoridade municipal.
- 3.—En canto estean cheos para o seu baleirado e sempre dentro do mesmo día en que se produza o seu enchido.
- 4.—Durante as fins de semana e festivos, para o que os colectores e provisións de material deberán retirarse antes das 19:00 horas do venres ou do día anterior ao festivo correspondente e, en todo caso, dentro das vinte e catro horas seguintes á finalización dos traballos.
- 5.—Unha vez finalizada a xornada laboral, cubrirase para impedir o espaxemento de materiais.

*ARTIGO 24.—MOBLES E PERTENZAS*

Queda prohibido o abandono en espazos públicos de mobles, electrodomésticos e demais pertenzas. As persoas que desexan desprenderse de tales elementos comunicaranos ao Concello, que lles orientará sobre o procedemento a seguir para a súa eliminación.

TÍTULO V
RESPONSABILIDADES, INFRACCIÓNS E SANCIÓNS

ARTIGO 25.—RESPONSABILIDADES

1.—As responsabilidades derivadas do incumprimento das obrigas sinaladas nesta ordenanza serán esixibles non só polos actos propios, senón tamén polos daquelas persoas e animais polos que se deba responder nos termos previstos no Código Civil.

2.—Cando se trate de obrigas colectivas como uso, conservación e limpeza de zonas comúns, a responsabilidade será atribuída á respectiva comunidade de propietarios/as ou habitantes do inmovible cando non estea constituída.

3.—Cando se causen danos a terceiras persoas como consecuencia da actuación das entidades que, no seu caso, realicen a xestión indirecta do servizo, estarase ao abeiro do establecido na lexislación de contratos das administracións públicas e pregos de cláusulas administrativas e prescricións técnicas que rexan o expediente de contratación.

ARTIGO 26.—RESPONSABILIDADE MUNICIPAL

O Concello responderá directamente dos danos e prexuízos causados a persoas particulares nos seus bens e dereitos como consecuencia do funcionamento dos servizos públicos ou da actuación das súas autoridades, funcionarios/as ou axentes, nos termos establecidos na lexislación xeral sobre responsabilidade administrativa.

ARTIGO 27.—TIPIFICACIÓN DAS INFRACCIÓNS

As infraccións á presente ordenanza clasifícanse en leves, graves e moi graves:

a) Considéranse infraccións leves as seguintes:

1. Incumprimento das normas sobre limpeza da vía pública como consecuencia do uso común xeral da cidadanía.

2. Ensuciar a vía pública como consecuencia da tenencia de animais ou por tirar outros pequenos residuos tales como gomitas de mascar, restos de froitos secos, cabichas, papeis, envoltorios, etc.

3. Ensuciar a vía pública como consecuencia do consumo de bebidas alcohólicas ou refrescantes, tanto en envases de cristal como de plástico, metal ou similares.

4. Librar residuos fóra dos colectores ou en elementos de contención distintos dos permitidos.

5. Depositar residuos en horas ou lugares distintos aos sinalados polos servizos municipais ou en colectores que non se correspondan co residuo depositado.

6. Incumprimento da obriga de limpeza en pasaxes e urbanizacións particulares.

7. Colocar, espaxar ou tirar panfletos, carteis, pancartas, bandeirolas ou materiais similares sen licenza municipal ou en lugares non autorizados.

*b) Considéranse infraccións graves as seguintes:*

1. Ensuciar a vía pública a consecuencia de efectuar obras e outras actividades que esixan limpeza segundo esta ordenanza.
2. Incumprimento da obriga de mantemento de limpeza de fachadas, rótulos anunciantes, toldos, medianeiras, entradas, escaleiras de acceso e, en xeral, todas as partes dos inmobles que sexan visibles dende a vía pública.
3. Incumprimento do deber de limpeza e mantemento de solares.
4. Ensuciar a vía pública a consecuencia de actividades en establecementos comerciais, hostaleiros, quioscos, postos na rúa e similares.
5. Abandonar mobles, pertenzas domésticas, materiais residuais ou outros obxectos similares en fincas, camiños ou calquera outro lugar non habilitado especialmente para iso.
6. Librar na vía pública residuos excluídos dos servizos de recollida domiciliaria e, por tanto, susceptibles dun especial tratamento e depósito, sempre que este feito non sexa clasificado como moi grave no apartado seguinte.
7. Incumprimento das normas desta ordenanza sobre actos públicos, pancartas, carteis, rótulos, pintadas e panfletos.
8. Non manter os elementos de contención retornables en perfectas condicións de uso e limpeza.
9. Efectuar manipulación de lixo na vía pública.
10. Librar envases e residuos de envases en colectores comúns ou na vía pública.
11. A reiteración de dúas faltas leves no período de dous anos.

c) Considéranse infraccións moi graves as seguintes:

1. Ensuciar a vía pública con motivo do transporte de materiais de obra, terras, entullos ou residuos especiais ao non ter adoptado medidas no vehículo para impedir os vertidos.
2. Efectuar vertidos de terras e entullos en lugares non autorizados.
3. Depositar na vía pública animais mortos ou residuos de carácter especial (perigosos, sanitarios, etc.)
4. Realizar actos vandálicos, pintadas ou pegar elementos publicitarios no mobiliario urbano (colectores, papeleiras, marqueseñas, etc.)
5. A reiteración de tres faltas graves no período de dous anos.

ARTIGO 28. – SANCIÓN S

As sancións que se poderán impoñer pola comisión das infraccións indicadas (artigo 141 da Lei 57/2003, do 16 de decembro, de medidas para a modernización do Goberno local) serán:

1. – Para as que teñan a consideración de leves poderase impoñer unha multa de ata 750 euros.
2. – Para as infraccións que teñan a consideración de graves poderase impoñer unha multa dende 751 euros ata 1.500 euros.
3. – Para as infraccións que teñan a consideración de moi graves poderase impoñer unha multa dende 1.501 euros ata 3.000 euros.

Todo isto sen prexuízo de esixirlles ás persoas responsables da infracción, se fose o caso, que realicen os traballos de eliminación do lixo ou sucidade xerada e que indemnicen os danos causados.

*ARTIGO 29.—PROCEDIMENTO SANCIONADOR*

Para a imposición das sancións que puideran derivarse desta ordenanza estarase ao abeiro do procedemento establecido no R.D. 1398/1993 do 4 de agosto, que aproba o Regulamento do procedemento para o exercicio da potestade sancionadora.

ARTIGO 30.—PRESCRICIÓN

As infraccións leves prescribirán aos seis meses, as graves ao ano e as moi graves aos dous anos.

ARTIGO 31.—CONCORRENCIA NA ESIXENCIA DE RESPONSABILIDADES

As sancións que poidan impoñerse en cumprimento do disposto nos artigos anteriores serán independentes das que poidan proceder como consecuencia da vulneración das disposicións sectoriais aplicables en materia urbanística, medioambiental, etc. e das indemnizacións de danos e prexuízos a prol de terceiras persoas que procedesen ou das accións de diferente natureza que a corporación poida exercitar ao respecto.

As responsabilidades e sancións mencionadas tramitaranse e executaranse, no seu caso, por vía executiva.

DISPOSICIÓN FINAIS

Primeira.—No non previsto na presente ordenanza, estarase ao abeiro do disposto na Lei 30/92, do 26 de novembro, de réxime xurídico das administracións públicas e do procedemento administrativo común e nas normas de carácter xeral reguladoras do réxime local, sen prexuízo da aplicación da lexislación sectorial na materia.

Segunda.—En aplicación da presente ordenanza, os actos e acordos municipais que poñan fin á vía administrativa poderán, logo do recurso de reposición, ser impugnados ante a xurisdición contencioso-administrativa, sen prexuízo do posible exercicio doutras accións que procedan ante a xurisdición competente.

Terceira.—A presente ordenanza entrará en vigor unha vez se teña publicado integramente o seu texto no Boletín Oficial da Provincia e teña transcorrido o prazo previsto no art. 65.2 da Lei 7/85 do 2 de abril, reguladora das bases do réxime local.

DISPOSICIÓN DERROGATORIA

Quedan derogadas cantas disposicións de igual ou inferior rango, incluídos bandos de Alcaldía, regulen as materias contidas nesta ordenanza en canto as contradigan ou sexan incompatibles con ela.

DISPOSICIÓN ADICIONAL

Facúltase expresamente o alcalde ou órgano que actúe por delegación expresa del nesta materia para interpretar, aclarar, desenvolver e executar as prescricións desta ordenanza, así como para suplir, transitoriamente por razóns de urxencia e ata que exista pronunciamento na primeira sesión que celebre a continuación o Pleno do Concello, os baleiros normativos que puidesen existir nela.

Contra o presente acordo, poderá interpoñerse recurso contencioso-administrativo, ante a Sala do Contencioso-Administrativo do Tribunal Superior de Xustiza de Galicia no prazo de dous meses a contar desde o día seguinte á publicación do presente anuncio, de conformidade co artigo 46 da Lei 29/1998, de 13 de xullo, da Xurisdición Contencioso-Administrativa.

Cangas, 20 de xaneiro de 2014.—O Alcalde, José Enrique Sotelo Villar.

2014000534

* * *